

FUAFUAGA TATAU

MO LE VAAIA LELEI O IA MA FIGOTA

O LE AFIOAGA O

LEUSOALII

(Tusia Aso 20 Setema 2001)

Saunia:

E Alii ma Faipule o Leusoali'i ma le Lagolagosua a le Vaega o Faigafaiva o le Matagaluega o Faatoaga ma Faigafaiva.

FAASOLOGA

1. **Upu Tomua**
 - 1.1 Sui Filifilia o le Komiti Faufautua
2. **Faamatalaga e uiga i le Afioaga**
 - 2.1 Faamatalaga o Foliga vaaia Faa-natura o le Afioaga
3. **Tulafono i Aso ua Mavae ma Aso nei**
 - 3.1 Aotelega o Tulafono o le Gataifale ma Faigafaiva i Aso ua mavae ma Aso nei
4. **O Ienei Fuafuaga Tatau**
 - 4.1 Autu
 - 4.2 Tapenaga
5. **Fuafuaga Faataatitia a le Afioaga**
 - 5.1 Tulafono faa-le-nuu: Faasaina Faigafaiva le talafeagai
 - 5.2 Ia Faasaina Tuiga ma Faamoa
 - 5.3 Ia Faasaina ona toe Lafoai lapisi i le sami
 - 5.4 Ia Faasaina le Faaaogaina o Upega ma Tili mataninii
 - 5.5 Ia Faasaina Faigafaiva mai isi Afioaga
 - 5.6 Ia Faasaina le soona fagotaina o I'a ma Figota laiti.
 - 5.7 Ia Faasaina ona toe ta i lalo o Laau i autafa o Vaitafe
 - 5.8 Ia Faasaina Lama moli uila
 - 5.9 Ia Faasaina ma Faateleina Amu
 - 5.10 Ia Taofia le faatau atu o Maisu, Fugafuga ma isi o nei ituaiga mo maketi i fafo
 - 5.11 Ia Faasalalauina Tulafono a le Afioaga
 - 5.12 Ia Aoina mai i uta Alamea ma faatamaia ai
 - 5.13 Ogasami Faasaina
 - 5.14 Tufaina atu ma le Faa-faatoagaina o I'a ma Figota
 - 5.15 Mana o Talosaga
6. **Talosaga**
 - 6.1 Talosaga a le Afioaga
7. **Toe Iloiloina o Ienei Fuafuaga Tatau**

1. UPU TOMUA

O le faaitiitia o i'a ma figota i Samoa e afua mai i le anoanoai o mafuaaga eseese. O nisi o nei mafuaaga e aofia ai;

- le tanumia o vaega o le gataifale mo eleele-fou (fanua)
- le soona fagotaina faa-le-tatau o le gataifale e le afaifaiva
- le faaogaina o faigafaiva-le-talafeagai
- ma aafiaga mai i afa malolosi (Ofa 1990, Val 1991, Heta 2004) ua tuanai.

O nei faafitauli o loo tulai mai pea i gataifale o si o tatou atunuu ma o loo avea lea ma auala e faaitiitia ai i'a ma figota. O le faaitiitia o nei tamaoiga o le sami e faaitiitia ai foi porotini maua (protein) mo le taumafa tatau (taumafa paleni) mo tagatanuu o Samoa. O se atugaluga tele lea i le Malo o Samoa na faapea ai ona faatino nisi o fuafuaga faataatitia e pei ona faailoaina atu i lalo.

O le tausaga e 1988 na pasiaina ai e le Kapeneta le **Tulafono Autu Tau Faigafaiva** e faamalositia ai le (i) laiseneina o vaa-fagota mo fagotaga, (ii) faasaina le faia o faigafaiva-le-talafeagai i ogasami o Samoa. Peitai ane o nei tulafono uma e lei silafia e le toatele o tagatanuu o Samoa i ia vaiata. O se tasi o mafuaaga ona o le toaitiiti ma le toagaogao o le afaigaluega. Ae o seisi mafuaaga ua talitonu le taofi na faigata ona ausia ai lea tulaga ona e lei iai se polokalame i lea vaiata e pei o le Polokalame o le Faasao o le Gataifale mo Nuu ma Afioga. O leni polokalame e pei ona faatinoaina nei, ua fesoasoani tele i le faa-malamalamaina mo le silafia e le mamalu o le atunuu o ia tulaga.

I le tausaga 1995 na pasiaina ai e le Kapeneta le **Tulafono Faatonutonu e Faatapulaaina ai le Laiti o I'a ma Figota**. O leni tulafono na pasiaina ma le faamoemoe e tuu avanoa ma fesoasoani i le faasaina o i'a ma figota ua tauu ona mou atu. O le faatapulaaina o le laiti o i'a ma figota e faataga mo le fagotaina ina ia ausia le lapopoa ina ia mafai ona tautuufua ma fanafanau e faatupulaia ai le faitau aofai o le tamaoiga o le gataifale. O loo faapipiina atu i le pito i tua o le Tusi Taiala se Pepa o Faamatalaga (6) mo faamatalaga faapopopo o leni tulafono.

O **Tulafono Laiti** a nuu ma afioga ua amanaia e le Faamasinoga. O se tasi lea o auala ua tuu sao ai e le Malo le malosi i nuu ma afioga e mafai ai ona o latou molia i le tulafono soo se tagata e le usitaia tulafono ua aiaia i totonu o le Tusi Taiala a le afioga o Leusoalii. O nei tulafono o loo i lalo o le vaega o Tulafono ma Faasalaga o le Tusi Taiala aua le pulea tatau ma le vaia lelei o le gataifale i tulaga o ona tamaoiga ma lona siosiomaga mo se lumanai manuia. O tulafono laiti e soalaupuleina ma autasi iai le Pule Mamalu a Alii ma Faipule o afioga taitasi.

Polokalame o le Faasaina o le Gataifale i Nuu ma Afioga

O le Polokalame o le Faasao na amataina e le Malo e taua mai lea i le auaunaga a le Ofisa o Faigafaiva i le tausaga e 1995. I le amataga mai la o leni polokalame sa faapea ona lagolago malosi ai le Malo o Ausetalia e auala ma i lana AusAID i le faa-tupeina mo le 5 tausaga seia oo mai i le tausaga e 2000 ma faamuta ai loa lana fesoasoani. Peitai na e lei faamuta ai i lea tausaga ona sa tauaveina loa e le Malo o Samoa le faatupeina o leni polokalame taua. I le taimi nei, ua oo atu le aofaiga i le 85 nuu ma afioga ua faatinoaina ai leni polokalame. Peitai, mai i le 85 lea, e na o le 52 nuu ma afioga o loo tulai malosi ma faatauaia pea leni polokalame. O le talitonuga ma le faamoemoe autu o le tele o nei afioga o le silasila lea i le lumanai manuia mo tagata lautele o le afioga aemaise ai o tupulaga lalovaoa.

O le polokalame o le Faasao e galulue soosoo-tauu iai le ofisa ma le afioga i nisi o fuafuaga faataatitia aua se lumanai manuia aemaise o le toe faa-tamaoigaina o le gataifale. I le amataina o leni polokalame e faatinoaina ai ni faatalatalanoaga ma vaega eseese o le nuu e pei o le vasega o matai, tina ma taulelea. O nei fefaasoaaiga e faailoa mai ai faafitauli o loo faafeagai ma le gataifale o le afioga. E talanoaina foi aafiaga ma mafuaaga o nei faafitauli ma soalaupule ai ni fofo. Ma sa faapea loa ona soalaupule ai e Alii

ma Faipule, tagatanuu o le afoaga ma le ofisa nisi o fuafuaga faataatitia e foia ai nei faafitauli. O se faataitaiga o se fuafuaga faataatia a le afoaga i leni polokalame o le faia lea o se ogasami faasao e faasa ona solia, kolosiina pe fagotaina foi.

O nisi o fuafuaga faataatitia e tele ona faaogaina e afoaga mo le pulea ma le vaaia lelei o tamaoiga (i'a ma figota) o le gataifale e aofia ai le faasaina o;

- vailaau oona
- fanaia
- ava-niu-kini
- tuiga, faamoa, seuga
- i'a ma figota laiti
- upega ma tili mataninii
- lama moli-uila i po

O nisi o fuafuaga o Tusi Taiala i le tele o afoaga mo le pulea tatau ma le vaaia lelei o le siosiomaga o le gataifale e aofia ai le;

- aoina o alamea (crown-of-thorn starfish)
- faasaina o le lauina o le oneone o matafaga
- lafoai o lapisi i le gataifale (matafaga)

O leni polokalame e taua tele mo le lumanai manuia o Samoa ma ona tagatanuu. O le faaleleia o le siosiomaga ma le faatuputupulaia o le tamaoiga o le gataifale o se faamoemoe e talitonu e mafai ona faatinoina i o tatou lava lima. E faa-tauaina tele le lagolagosua a le Pule ma le Faamalumaluga a Alii ma Faipule o afoaga i leni polokalame.

1.1 Sui Filifilia o le Komiti Faufautua

O le faatinoina o faatalatalanoaga ma komiti taitasi i totonu o le afio'aga, e soalaupule ai manatu ma mataupu taitasi e le mamalu o le afioaga i ona vaega eseese. I lenei faatalatalanoaga e fefaasoai i fafitauli o feagai ma le afioaga, ato ai ma le soalaupuleina o ni fofo o nei faafitauli. E le gata i lea ae faamautuina ai foi aiaiga uma mo le faamalosi o tulafono taitasi aua le alualu i luma ma le sologa lelei pea o le faasao a le afio'aga. O le Komiti Faufautua, o i latou na ua filifilia e nafa ma le fautuaina o mataupu mo le vaai ma le sologa malie pea i luma o le Faasao a le afio'aga.

A maea ona filifilia sui o le Komiti Faufautua, ona filifilia loa lea o sui o le komiti o le Faasao mai vaega e tolu sa faatalatalanoaina. E aofia ai ni sui se toatolu mai le Komiti a Matai, tolu mai le Komiti a Tina, ma le isi toatolu mai le Komiti a Aumaga poo taulelea.

Komiti Matai : Tauaifoiga Motu Talavalu Talolua Samoa Fotu Tofae A Maalo Leoo Lotu	Agaimalo Siaki Tuavao Amoula Tagaleoo Fatila Taumalie Aimaasu	Malauia Afa (Pulenuu) Maoga Ioane Lealao Apisaloma Magalelei Tavita
---	--	--

Komiti Tina: Talosaga Tagiilima Suesa Samoa	Lotovale Tuavao Mafatua Ropeti	Nancy Viliamu Faitala Talisau
---	-----------------------------------	----------------------------------

Komiti Aumaga : Malota Pasi Tai Gai Sialafua Faleafa	Lilo Aliilua Vili Soe	Kuresa Tauai Tokio Lemaluifaga
---	--------------------------	-----------------------------------

SUI AUAI O LE AFIOAGA (FAATALATALANOAGA I VAEGA):

Komiti Matai: Tauaifaiga Motu Gai Tautalafua Agaimalo Siaki Faasootauloa Peni Tagaleoo Fatila	Samoa Fotu Sauafea Semi Lemaluifaga Malala TalavaluTalolua Tofae A Maalo	Faleafa Pili Magalelei Tavita Tuulua Ueli Tofae Fa'ivae
--	--	--

Komiti Tina : Tuulenana Gai Miriam Viliamu Miriam Vailu'u Lotovale Amoula	TalosagaTagiilima Faleuaina Mika Nancy Viliamu	Suesa Samoa Tulutulu Fulu Tali Leoo
---	--	---

Komiti Aumaga : Lilo Aliilua Siala Manu	Malota Pasi Kuresa Motu	Talolua Talavalu Terry Vainuu
---	----------------------------	----------------------------------

SUI O LE OFISA O FAIGAFaIVA:

Nanai Tanielu Sua	Faatonu Lagolago o Faigafaiva
Gu Savali Time	Sui Faatonu Lagolago o Faigafaiva
Etuati Ropeti	Sui Ofisa Sili o Faigafaiva
Autalavou Taua	Alii Ofisa sinia o Faigafaiva
Mausii Mose	Alii Ofisa mo le Vafealoai ma nuu ma Afioaga
Faataui Sione	Alii Ofisa o Faigafaiva
Tauvae Sua	Alii Ofisa Lagolago Faigafaiva
Kaisara Liu	Alii Ofisa Lagolago Fagaigafaiva

Ulusapeti Tiitii
Aa Mauletaua
Mataitusi Gaumatau

Tamaitai Ofisa Lagolago Faigafaiva
Tamaitai Ofisa Lagolago Faigafaiva
Tamaitai Ofisa Lagolago Faigafaiva

2. FAAMATALAGA E UIGA I LE AFIOAGA

2.1 Faamatalaga o Foliga vaaia Faa-natura o le Afioaga

FAALAUATELE

Faamatalaga

- O le faitau aofai o tagatanuu o Leusoalii e 500 i le 550.
- O le aofai o aoga i totonu o lenei afioaga: Tulagalua 1
- Tapuaiga i totonu o le afioaga: Metotisi 1
EFKS 1
- Fuaina o le umi o le aau o Leusoalii (mita) e tusa ma le 500 mita.
- O le mamao o le aau mai le matafaga e 20 i le 30 mita.
- O le loloto na fuaina (mita) mo vaega e aupito sili ona loloto o le aloalo pe a pe le tai i le taimi nei e 1 ma le ½ mita.
- Na fuaina foi le loloto (mita) mo vaega e aupito sili ona loloto o le aloalo pe a le tai i le taimi nei e ½ mita.

FAIGAFAlVA

Faamatalaga

O le faitau aofai o tane faifaiva e fagogota i le sili atu ma le tasi le aso i le vaiaso e 20 i le 40 tane.

O le faitau aofai o tina faifaiva e fagogota i le sili atu ma le tasi le aso i le vaiaso e 5 i le 6 tina.

O le aofaiga o tagata e fagogota i tuaau mai le tasi le aso o le vaiaso e na o le 1 i le 2 tagata.

E 2 ni paopao o loo faaogaina mo faigafaiva i totonu o Leusoalii.

E leai se alia fagota o faaogaina mo faigafaiva a le afioaga o Leusoalii.

E le faatagaina ni tagata mai isi afioaga ona fagogota i le gataifale o le afioaga.

FAIGAFAlVA I LE AFIOAGA

<u>Ituaiga l'a/figota</u>	<u>Ituaiga Faiva</u>	<u>Taimi faaalu mo le tasi le tau'i'a ma ofu (itula)</u>	
		<u>Taimi nei</u>	<u>10 tausaga taluai</u>
<i>la maua soo (5):</i>			
1. Alogo	lama/ matatao	2 itula	1 itula
2. Pone	lama/ matatao	2 itula	1 itula
3. Gatala	lama/ matatao	2 itula	1 itula
4. Manini	lama/ matatao	2 itula	1 itula
5. Malau	Tautu	2 itula	1 itula

Figota maua soo (3):

1. Tugane	Elitugane	1 ma le 1/2 itula	½ itula
2. Fugafua	Faifugafuga	1 itula	½ itula
3. Sea	Tuisea	3 itula	1 itula

O ISI FAIGAFAlVA I LE AfIOAGA

<u>Isi Faigafaiva sami</u>	<u>Isi taumafa o le taua (itula)</u>	<u>Taimi faaalu mo mea ua</u>
1. Seuseu	Gatala	3 itula
2. Upega	Anae	½ itula
3. Toso pa	Malau	1 itula
4. Faotuitui	Tuitui	10 minute
5. Tolosisi	Sisi	½ itula

VAEGA TAUA O LE SIOSIOMAGA MO FAIGAFAlVA

<u>Vaega</u>	<u>Vaega taua (sikuea mita)</u>	<u>Taimi nei</u>	<u>Sefulu tausaga ua tea</u>
Togatogo	Leai	Leai	Leai
Amu	¼ sikuea mita	¾ sikuea mita	¾ sikuea mita
Vaovao o le sami	¾ sikuea mita	¾ sikuea mita	¼ sikuea mita

3. TULAFONO I ASO UA MAVAE MA ASO NEI

I totonu o le afioaga, ua maea lelei ona aiaia tulafono ua faatulagaina mo le tausia ma le vaaia lelei o le gataifale. Ua maea foi ona soalaupule ma ua mautinoa lo latou malu pupuia i soo se vaega o atinae o le siosiomaga o le gataifale mo faigafaiva. E le gata i lea o le toe tagatagai totoa lea o le pule mamalu a Alii ma Faipule o le afioaga o Leusoalii i tulafono i aso ua mavae mo le toe faaauuina pea, aemaise o le toe talanoaina o nisi tulafono faapoopo mo le lelei atili ma le sologa lelei o le tamaoaiga o le gataifale.

3.1 Aotelega o Tulafono o le Gtaifale ma Faigafaiva i Aso ua mavae ma Aso nei.**Tulafono a le Afioaga o Leusoalii i aso ua mavae:**

O le faasaina o faigafaiva le talafeagai:

- Fanaia
- Ava-niu-kini
- Vailaau oona

O nei tulafono sa faasalalauina i le leitio (2AP)

O tulafono uma ia o loo faamamaluina ma amanaiaina e pei ona sa iai i le taimi muamua faatoa faamamaluina ai i totonu o le afioaga o Leusoalii. Ae peitai e le o mamalu i nei vaitaimi ona o le amanaiaina e isi tagata o le afioaga atoa ai ma isi afioaga, o nei tulafono.

O nisi o mafuaaga e pei ona taua e aofia ai:

- Leai o se lagolago mai le Malo
- O nisi o tagata o loo mafaufau mo le taimi nei ae le o mafaufau i le taimi o i luma ma le lumanai o

tupulaga.

O nei mafuaaga uma o loo aafia i le Fuafuaga mo le Pulega o le Siosiomaga o le Gataifale ma le Vaaia Lelei o i'a ma figota.

E le gafatia e le malosi faaetulafono a le Malo ona malu puipuia le siosiomaga o le gataifale ma ona tamaoaiga. E utiuti tulaga tau tupe ma toagaogao foi le afaigaluega a le Malo latou te faamalasia ma unaia tulafono tau faigafaiva i nuu taitasi o Samoa. O le fofu talafeagai o loo i aao lava o le pule a Alii ma Faipule o le afioaga. O le a le pine ona unaia tagata latou te galulue faatasi ina ia malupuipuia ma faaleleia le siosiomaga o le gataifale ma ona tamaoaiga mo nei ma tupulaga o le lumanai.

4. O LENEI FUAFUAGA TATAU

4.1 Autu

O lenei fuafuaga ua taua ai ni faatinoga e manaomia ina ia maua ai sona taunuuga maumaututu. O le faamoemoe maualuga o le Malo ina ia faaleleia le soifua manuia o tagata o le afioaga, ma ia faatupulaia taumafa mai le sami. O lea e manaomia ai tagata uma ina ia avea nei faatinoga e puipuia ai le siosiomaga o le gataifale ma ia fuafua tatau ai le fagotaina o i'a ma figota.

“Ina ia puipuia le siosiomaga o le gataifale ma le toe faatupulaia o i'a ma figota mo tupulaga i le lumanai”

Na ioeina e le fonotaga a le Komiti o le Faasao i le Aso 28 Aukuso 2001, o le Komiti lava lenei latou te faamalasia ma unaia vaega eseese uma o le afioaga auā le puipuia ma le faasaoina o atinae ma alamanuia o le gataifale o Leusoalii. O le Komiti foi lenei o loo nafa ma le tapenaina o tulafono aemaise o vaega uma e tatau mo lenei Tusi Taiala, atoa ai ma le tuuina atu i le pule mamalu a Alii ma Faipule mo le pasiaina. O lenei Tusi Taiala ua faamoemoe ia oo atu i le tolu tausaga o loo faaogaina pea, ae peitai afai ae iai se suiga e ao loa ona toe iloiloina lenei Tusi Taiala.

4.2 Tapenaga

O lenei tapenaga sa saunia lava e Alii & Faipule ma tagata o le afioaga o Leusoalii, faatasi ai ma ni fautuaga ma le lagolagosua a le Ofisa o Faigafaiva o le Matagaluega o Faatoaga ma Faigafaiva. O se oototoga lenei o le tapenaga a le Pulega o le Siosiomaga o le Gataifale ma le Vaaia Lelei o i'a ma figota.

Feiloaiga Muamua:

O le feiloaiga muamua lenei sa talosagaina lea e le Pulenuu le afioga ia Tofae Maalo i le Aso 3 o Iulai 2001. O Aukuso i lona aso 6 sa tauaofia ai le uluai fono a sui o le Ofisa ma le afioaga mo le faamalamalamaina ma le taliaina o lenei polokalame.

Vaevaeina o Vaega:

Sa vaevaeina le afioaga i vaega e aafia ai Matai, Tina ma Taulelea. Sa feiloai vaega taitasi ma sui o le Ofisa o Faigafaiva, ma faatalatalanoaina loa faafitauli o loo aliae i le gataifale o le afioaga atoa ai ma ni fofu talafeagai e foia ai nei faafitauli.

Komiti Faufautua:

I lenei Komiti o loo aafia ai sui sa filifilia mai i vaega taitasi. O le komiti faufautua lenei e galulue faatasi ma le Ofisa o Faigafaiva i le saunia ma le tapenaina o se ata faataitai o le Tusi Taiala. O lenei ata faataitai o le Tusi Taiala o loo tuufaatasia ai faamaumauga ma faamatalaga mai vaega taitasi. O lenei foi Tusi Taiala o loo aafia ai lagona o tagata o le afioaga i le puleaina o Faigafaiva ma le siosiomaga o le gataifale.

Afai ae mautu, ona tuuina atu lea i le fono a matai mo ni fautuaga ma le pasiaina.

5. FUAFUAGA FAATAATITIA A LE AFIOAGA

O fuafuaga faataatitia o ni galuega faatino ua faia ina ia foia ai faafitauli ua faailoa mai e vaega eseese o le afioaga. E lua (2) ituaiga fuafuaga faataatitia

(i) fuafuaga e faatinoina e le afioaga

(ii) fuafuaga e faatinoina e le Ofisa o Faigafaiva.

O nei fuafuaga o le a tuuina atu ai fautuaga ma fesoasoani i le tapenaina o le Tusi Taiala.

O fuafuaga faataatitia uma a le Ofisa o Faigafaiva e ao ona faamaonia muamua e le Faatonu Lagolago o Faigafaiva (ACEO) a le Matagaluega o Faatoaga ma Faigafaiva. O nei fuafuaga uma ua faamoemoe lo latou faataunuuina i le lagolagosua mai a le afioaga ma ona tagatanuu. O le a faaauau pea ona tuuina atu ni fesoasoani i le afioaga e ala i pepa o faamatalaga atoa ai ma le faia o ni mafutaga faaleaoaoga (workshops /trainings), i aoga, faalapopotoga faa-le-Ekalesia ma isi ituaiga faalapopotoga i totonu o le afioaga.

5.1 Tulafono faa-le-nuu: Faasaina Faigafaiva le talafeagai.

Otootoga

Ua maitauina pea e le afioaga le faaogaina pea e nisi o faifaiva o faigafaiva le talafeagai e aofia ai fanaia, ava niu kini ma vailaau oona. O nei faigafaiva, ua mautinoa le ogaoga o ona aafiaga i le faatamaiaina o se vaega tele o le siosiomaga o le gataifale, e pei o i'a laiti, ma figota aemaise o amu. A faaleagaina le alititai o lona uiga o le a leai ni i'a ma ni figota e toe maua ai. O le faaauauina pea o le faaogaina o nei faigafaiva, o le a umi lava se taimi e toe tau faafoi ai i lona tulaga lelei sa iai muamua.

Fuafuaga Faataatitia a le Afioaga

Talu ai ona o le tulaga pagatia ua iai le gataifale o lenei nuu o Leusoalii o lea ua ae ai se finagalo autasi i le komiti ua filifilia ina ia toe faamalosi tulafono a le afioaga sa faia i aso ua mavae e faasaina ai faigafaiva le talafeagai, e pei o fanaia, ava niu kini ma vailaau oona. O le puipuiga ma le faamamaluina o nei tulafono o loo i aao lava o le Pule Mamalu a Alii ma Faipule faatasi ai ma le lagolagosua a tagata nuu o le afioaga.

Fautuaga

Ia toe faamalosi ma faamamaluina tulafono ua taua i lalo a le afioaga mo le faasaina o faigafaiva le talafeagai.

Tulafono:

Ua matua faasaina faigafaiva le talafeagai e pei o fanaia, ava niukini, ma vailaau oona ona toe faatinoina i gataifale o Leusoalii e amata mai i le tuaoi i Sasae seia oo atu i le tuaoi Sisifo o le afioaga.

Faasalaga

So o se tagata o le afioaga e solia lenei tulafono o le a faasalaina i le \$200.

O tagata mai isi afioaga o le a molia i le Tulafono Autu Tau Faigafaiva ma le Tulafono Laiti faafaigafaiva.

Fuafuaga Faataatitia a le Ofisa o Faigafaiva

O le a fesoasoani le Ofisa o Faigafaiva mo le faatinoina o fuafuaga faataatitia a le afioaga e ala atu i lana

polokalame fesoasoani mo aoaoga tau faigafaiva.

5.2 Ia faasaina Tuiga ma Faamoa

Otootoga

Ua maitauina o se tasi lenei o ituaiga faigafaiva le talafeagai sa matua faaleagaina ai amu aemaise o i'a ma figota laiti i aso ua mavae, e ui lava e le o toe faatinoina i lenei vaitau. Peitai e i ai le talitonuga, afai ae toe faaauauina nei ituaiga faigafaiva o le a sili atu ona tele se afaina o amu o loo fai ma ofaga o i'a ma figota o le gataifale.

Fuafuaga Faataatitia a le Afioga:

Na faaalua e le afioga, e tataua ona toe faamautuina le tulafono e faasaina ai tuiga ma faamoa i gataifale o Leusoalii, aua sa mautinoa le matua faaleagaina ai o amu faapea isi meaola ninii o le gataifale i aso ua tuanai. Ua matua lagolagoina e le Komiti o le Faasao lenei manatu ma ua tuufaatasia ai loa lenei fuafuaga i le tulafono mo faigafaiva le talafeagai.

Tulafono:

Ua matua faasaina lava ni faigafaiva e i ai tuiga ma faamoa ona toe faatinoina i gataifale o lenei afioga o Leusoalii

Faasalaga:

*So o se tagata o le afioga na te solia lenei tulafono, o le a faasalaina i le \$200.
O tagata mai isi afioga o le a molia i le tulafono o Faigafaiva a le Malo.*

Fuafuaga Faataatitia a le Ofisa o Faigafaiva

O le a fesoasoani le Ofisa i le faamautuina mo le faamalositia o lenei tulafono. E lagolagoina foi e le Ofisa so o se fuafuaga a le afioga ua talafeagai lelei ma le tulafono faa-le-malo mo le puipuia lelei o le gataifale ma le siosiomaga.

5.3 Ia Faasaina ona toe Lafoai Lapisi i le Sami

Otootoga

O le lafoai o otaota i le sami ma matafaga o le a avea ma nofoaga e tautuufua ai namu ma pipisi ai faamai e aafia ai le soifua maloloina. E le gata i lea ae o nisi o lapisi e pei o atigi apa ma atigi fagu, e faamanualia ai aao o le au faifaiva, aemaise o le aafia ai o nofoaga o loo tautuufua ai meaola o le gataifale.

O le foia o nei faafitauli o le eliina o se lua e lafoai uma iai otaotsa a le afioga atoa. Talu ai e mafai ona tafe ma ulu atu le oona o otaota, lapisi ma vaillaau e lafoaina i le lua, o lea e fautuaina ai le eliina o nei lua i nofoaga tau mamao ese mai puna-vai ma le sami.

Fuafuaga Faataatia a le Afioga

Ua lagolagoina e le afioga le fuafuaga a le Malo mo le aoina o lapisi, e ala lea i le fausiaina o ni fata lapisi. O lenei fuafuaga ua malu puipuia lelei e Alii ma Faipule aemaise o tagatanuu o Leusoalii.

Tulafono:

Ua matua faasaina ona toe lafoai lapisi e iai pepa iila, atigifagu, atigiapa ma isi lava ituaiga lapisi i gataifale o Leusoalii

Faasalaga

Mo tagata o le afioga e solia lenei tulafono, o le a faasalaina i le \$200.

O tagata mai isi afioaga o le a molia sao i le tulafono o Faigafaiva a le Malo.

Fuafuaga Faataatia a le Ofisa o Faigafaiva

O faamatalaga eseese e faatatau i aafiaga o le siosiomaga o le gataifale ma ona tamaoaiga, o le a fesoasoani iai le Ofisa o Faigafaiva e aotauina le afioaga i le taua o le teu maluina o lapisi ma otaota i nofoaga talafeagai.

5.4 Ia Faasaina Upega ma Tili mataninii

Otootoga

Ua maitauina le tele o i'a laiti ua faatamaia ona ole faaaogaina o upega ma tili mata ninii. Ua iai le talitonuga o le a oo atu i se tulaga faaletonu i'a maua, pe a faaauauina pea le faaaogaina o nei ituaiga faigafaiva, ma o le a leai se avanoa e mafai ai ona oo atu i lo latou lapopoa e fanafanau ma tautuufua ai.

Fuafuaga Faataatitia a le Afioaga

Na taua e le Komiti o le Faasao o le faaaogaina o nei metotia faafaigafaiva, o se tasi o mafuaaga ua faaititia ai i'a maua. O lea ua aiaia ai se tulafono e faasaina ai upega ma tili mataninii ona toe faaaogaina i fagotaga. Na faaalua foi e le afioaga lo latou lagolagoina o le tulafono o Faigafaiva ua i ai nei, mo le faatapulaaina o mataupega ma tili.

Tulafono Laiti

Ua matua faasaina lava ona toe faaaogaina upega tatao e i lalo ifo o le 2 inisi (50 mm) ona mataupega faapea foi ma tili ia le iititi ifo o le 1.2 inisi (30 mm), i gataifale o Leusoalii.

Faasalaga.

O tagata o le afioaga e solia lenei tulafono o le a faia loa iai le finagalo o le Pule Mamalu a Alii ma Faipule.

Mo tagata mai isi afioaga o le a molia sao i le Tulafono Autu Tau Faigafaiva, Tulafono Faatonutonu ma Tulafono Laiti.

Fuafuaga Faataatitia a le Ofisa o Faigafaiva

O le lagolagosua mai le Ofisa o Faigafaiva e ala i lana Polokalame Fesoasoani, o le tuuina atu lea o faamatalaga e saga faamautuina ma faamaopoopoina ai lenei tulafono.

5.5 Ia Faasaina Faigafaiva mai isi Afioaga

Otootoga

O fagotaga mai isi nuu e faaogaina ai faigafaiva le talafeagai, e iai ava niukini, fanaia, vailaau oona, faamoia ma tuiga, ua mautinoa le matua faaleagaina ai o le gataifale.

Fuafuaga Faataatitia a le Afioaga

Ua iai se fuafuaga a le afioaga, o le a faia se tulafono e faasaina ai fagotaga mai isi afioaga, ona ua mautinoa lo latou faaaogaina o faigafaiva le talafeagai, lama moli uila ma mea manava. Ua maitauina le matua faaleagaina o le gataifale o Leusoalii i le faaaogaina o nei faigafaiva e tagata mai isi afioaga.

Tulafono-:

Ua matua faasaina lava tagata mai isi afioaga ona toe fagotaina gataifale o Leusoalii, e

faaogaina ai faigafaiva le talafeagai e pei o fanaia, ava niu kini, vailaau oona, ma isi lava ituaiga o faigafaiva

Faasalaga

O le a molia i le Tulafono Autu ma Tulafono Laiti o Faigafaiva a le malo soo se tasi e le utagia lenei tulafono.

Fuafuaga Faataatitia a le Ofisa o Faigafaiva

O le a fesoasoani le Ofisa i le faamalosia ma le faamautuina o lenei tulafono.

5.6 Ia faasa ona toe fagotaina I'a ma Figota Laiti

Otootoga

O le fagotaina tatau o i'a ma figota o se itu lelei tele ma talafeagai mo le faasaoina ma le toe faatupulaia o meaola o le gataifale. O le a mafai ai ona maua e i'a ma figota laiti le avanoa e tutupu ma fanafanau ai. O le tele o le fagotaina o i'a ma figota laiti, o le a leai ai so latou sao i le isi augatupulaga e sosoo ai. O le faaauauina pea o lenei faafitauli, o le a faaititia ai le tamaoaiga o le gataifale.

Fuafuaga faataatitia a le Afioga

Ua faaalua e le afioga lo latou lagolagoina o le Tulafono Faatonutonu o Faigafaiva mo le lapopoa faatulagaina o i'a ma fagota e tatau ona fagotaina. Na taua foi o le faamalosia o lenei tulafono, o le a iai pea lea i le pule mamalu a Alii ma Faipule. Ua lagolagoina foi e le afioga pepa o faamatalaga o loo faaalua ai fua faatapulaa o le laiti o i'a ma figota e fai ma taiala.

Tulafono Laiti

Ua matua faasaina ona toe fagotaina i'a ma figota laiti mai le gataifale o Leusoalii, e pei ona faaalua i le Tulafono Faatonutonu o Faigafaiva a le Malo.

Faasalaga:

*Mo soo se tagata o le afioga e solia lenei tulafono, o le a faasalaina i le \$200.
Mo tagata mai isi afioga o le a molia sao i le Tulafono Faatonutonu o Faigafaiva.*

Fuafuaga faataatitia a le Ofisa o Faigafaiva

O le a fesoasoani le Ofisa i le faamautuina o lenei tulafono e ala i pepa o faamatalaga, mo le faamalamalamaina atili aua le silafia e le afioga.

5.7 Ia Faasa ona toe taina i lalo laau i autafa o Vaitafe

Otootoga

Ua avea le taina i lalo o laau i autafa o vaitafe ma faapogai o le palapala tafia ma agai atu i le sami. O nei palapala o loo filogia faatasi ma nisi o faalelei eleele o loo faaogaina i faatoaga. E tele se avanoa e mafai ai e nei palapala ona faatupuina le limu ua faateleina ai meaola mamate i le sami. Ua le gata i i'a ma figota ae ua faapena foi ona faaititia ai amu i le gataifale.

Fuafuaga Faataatitia a le Afioga.

Ua manatu le afioga ina ia faia se fuafuaga e taofia ai le taina i lalo o laau i autafa o vaitafe ao le i oo atu i se tulaga ogaoga ona aafiaga. O lea ua fautuaina ai le afioga ina ia taofia loa le toe taina o le vaomatua, ona ua mautinoa le faatamaia ai o le gataifale.

Tulafono:

Ua matua faasaina lava ona toe taina i lalo laau i o vaitafe o le afioga o Leusoalii

Faasalaga

*So o se tagata o le afioga na te solia lenei tulafono o le a faasalaina i le \$200.
O tagata mai isi afioga o le a molia i Tulafono Laiti o Faigafaiva.*

Fuafuaga Faataatitia a le Ofisa o Faigafaiva.

O le a mafai ona faia pea ni tautalaga ma ni polokalame faa-le-aoaoga ina ia faamalamalama atiliina ai tulaga uma e ono foia ai le faafitauli ua taua i luga.

5.8 Ia Faasaina Lama moli uila mai isi Afioga**Otootoga.**

O le taofi maumautu o Alii ma Faipule, o le faaaogaina o moli uila mo lama ma fagotaga i po o se tasi o auala ua mautinoa le faaitiita ai o i'a ma figota. O lenei metotia faafaigafaiva e mautinoa le tele ai o i'a maua. Afai ae le pulea tatauina nei ituaiga auala o fagotaga, ua iai le talitonuga o le a oo atu i se tulaga faaletonu i'a maua.

Fuafuaga Faataatitia a le Afioga.

Ua faailoa mai le faaaogaina pea e nisi o moli uila i fagotaga i gataifale o Leusoalii. O lea ua ae ai se tofa i alii ma faipule o le a faatagina na o le aufaifaiva o Leusoalii ona fagotaina soo se vaega o le gataifale, ae ia aua lava nei paia le nofoaga faasaoina.

Tulafono

Ua matua faasaina lava ona tagata mai isi afioga ona toe faaaogaina moli uila mo fagotaga i po i gataifale o Leusoalii

Faasalaga

*Soo se tagata o le afioga e maua o faaaogaina moli uila i totonu o le nofoaga faasaoina o le a faasalaina i le \$500.
O tagata mai isi afioga o le a molia sao lava i Tulafono Laiti o Faigafaiva.*

Fuafuaga Faataatitia a le Ofisa o Faigafaiva.

O le a fesoasoani le ofisa e ala i mafutaga faa-le-aoaoga e faamalamalamaina lenei mataupu, mo le siafia e le afioga.

5.9 Ia Faasaoina ma Faateleina amu**Otootoga**

O le puipuia ma le faasaoina o amu, o se itu lelei lea mo i'a ma figota aemaise meaola ninii o le gataifale

o loo faalagolago iai mo meaai ma nofoaga. O le faia o se ogasami faasaoina ma le taofia o faigafaiva le talafeagai o nisi ia o fuafuaga tatau ma le talafeagai mo le faateleina o amu.

Fuafuaga Faataatitia a le Afioga

O le faia o se ogasami faasaoina o se auala na faailoa e le afioga le mautinoa lelei ole faateleina o amu, i'a ma figota. Na faaalua foi lo latou finagalo, o le a mataituina ma vaaia lelei lea nofoaga e Alii ma Faipule aemaise o ona tagatanuu.

Fuafuaga Faataatitia a le Ofisa o Faigafaiva

O le a fesasoani le Ofisa i le faamalamalamaina o itu lelei mo le faasaoina o amu, ma tufaina atu foi ni pepa o faamatalaga e faalauiloa atili ai lenei mataupu.

5.10 Ia Taofia le toe Faatauina atu o Maisu, Fugafuga ma isi ituaiga mo maketi i fafo

Otootoga.

O figota e pei o fugafuga, sea, ma isi ituaiga o loo fagotaina mo le tausiga o aiga. O nei figota e faigofie ona fagotaina ona e mau i nofoaga papau. Ua i ai le popolega e ono faaititia le tamaoiga i nei figota i le lumanai pe afai o le a faaauau pea ona auina atu mo maketi i fafo. O lea ua moomia tele ai ni tulafono e ao ona puipua ai le soona fagotaina.

Fuafuaga Faataatitia a le Afioga

O le fagotaina o fugafuga ma isi ituaiga mo maketi i fafo ua mafua ai ona faaititia figota i le gataifale o le Afioga.

Tulafono Faafautuaga:

Ia faamutaina ma faasaina ona toe fagotaina nei figota mo le auina atu i maketi i fafo, a tau lava mo le fofoga taumafa, tausiga o aiga, ma faatau atu i faleoloa ma le maketi i le taulaga.

Faasalaga:

O le a faasalaina i le \$200 so o se tagata o le Afioga na te solia lenei tulafono. O tagata mai isi afioga, o le a molia i Tulafono Laiti o Faigafaiva.

Fuafuaga Faataatitia a le Ofisa o Faigafaiva.

O le a tuuina mai e le Ofisa ni fautuaga ma ni faamatalaga e faatatau i ni auala talafeagai e fagotaina ai nei figota.

5.11 Ia Faasalalauina Tulafono a le Afioga

Otootoga

O faasalalauina i leitio, televise ma nusipepa o nisi ia o auala talafeagai lelei e faalauteleina ai tulafono a le afioga. O le a silafia ai e le mamalu o le atunuu, malamalama ma manino lelei i le faatauina ma le puipua o le siosiomaga o Leusoalii.

Fuafuaga Faataatitia a le Afioga

Ua fautuaina e le afioga ia faasalalauina tulafono, ua faamoemoe e faaagaga mo le puipua o le siosiomaga o le gataifale ma lona tamaoiga. O le Komiti o le Faasao o le a latou faamaopopoina ma tapenaina faasalalauina o tulafono.

Autu o le Faasalalauina: "Puipua o le gataifale o Leusoalii"

5.12 Ia Aoina mai i uta Alamea ma faatamaia ai

Otootoga

O le alamea o se meaola o le ituaiga o le aveau ma e nofo i luga o le aau, na te aina meaola ninii ua taua o polipe o loo ola i amu. A oo ina faateleina, ona latou faatamaiaina lea o se vaega tele o le aau, ma oo atu ai i se tulaga pagatia. O le a aafia ai le tele o meaola o loo faalagolago i le aau mo nofoaga ma meaai. E le mafai ona vaevaeina le alamea i le sami aua e mafai ai e nei itu tino ona faatupuina nisi alamea fou.

O se auala e mafai ona tapeina ai lenei meaola o le aoina lea i uta e faamago ai ma tanuina. E mafai ona faaogaina lenei meaola o se faalelei eleele mo faatoaga ma mea toto.

Fuafuaga Faataatitia a le Afioga

Na taua e le afioga o le alamea o se tasi lea o faafitauli o aliae mai lona tulaga ogaoga. E fai o le faatamaiaina o amu, ao le aafia ai foi o le soifua o tagata fagogota, ma ua ae ai se manatu ina ia faatulagaina ni fofu mo lea faafitauli.

Fautuaga

Ua fautuaina e le afioga le autautai uma ina ia aoina i uta le alamea pe a vaaia i gataifale i taimi o fagotaga mo le faatamaiaina.

Fuafuaga Faataatitia a le Ofisa o Faigafaiva

E leai se polokalame a le Malo ua fuafuaina mo le faatamaiaina o le alamea, vagana ai ni fautuaga e ala atu i Pepa o Faamatalaga ua maea ona saunia e le Ofisa o Faigafaiva, i auala talafeagai e tineia ai lenei meaola faalafua.

5.13 Ogasami Faasoina

Otootoga

Na faailoa e le afioga o le faia o se ogasami faasoina o le malu puipua lea o le siosiomaga o le gataifale ma lona tamaoiga e ala i i'a ma figota. O lenei foi vaega e le mafai ona toe aafia ini fagotaga a le afioga ma fafo atu. O le autu ma le faamoemoe o lenei faasao o le toe faateleina ma le faatupulaia o i'a ma figota i le gataifale, ma ia maua e nei meaola se avanoa e tautuufua ma fanafanau ai. E mafai foi e lenei faasao ona toe faaleleia nisi o vaega o le gataifale ua afaina e pei o amu ma aau. O le a le pine ona manuia si o tatou atunuu aemaise tupulaga o le lumanai.

Tulafono:

Ua matua faasaina lava soo se tagata ona faatinoina soo se ituaiga o faiva i totonu o le nofoaga faasoina mo i'a ma figota. Ua faasaina ni taelega pe kolosiina foi e se vaafagota le nofoaga faasao o lenei afioga.

Faasalaga

Soo se tagata o le Afioga e solia lenei tulafono, o le a faasalaina i le \$500. O tagata mai isi afioga o le a molia sao i le Tulafono Laiti o Faigafaiva.

Fuafuaga Faataatitia a le Afioga

O le a filifilia lava e le afioga se vaega o le gataifale e faasoina. O le a latou fausiaina foi se tulafono e faasaina ai ni faigafaiva ona toe faatinoina i lea vaega. O le afioga foi latou te faamalositia nei tulafono ma mataituina le tausiga ma vaaia lelei o le nofoaga ua faasoina mo i'a ma figota.

Fuafuaga Faataatitia a le Ofisa o Faigafaiva

Ua faamaoti mai e le Ofisa o Faigafaiva le faatinoina o ni iloiloga mo se vaega o le gataifale e tatau ona faasaoina. O le a latou saunia ni lipoti mo le tuuina aloaia atu i le Komiti o le Pulega o Faigafaiva. E le gata i lea ae o le a tuuina atu foi ni fautuaga mo le tausiga, pulea ma le vaaia lelei o lea nofoaga.

5.14 Tufaina atu ma le faa-faatoagaina o i'a ma figota

Otootoga

O nei i'a ma figota, o loo aumaia i fafo, o le a fuafua foi lona tufaina atu i ogasami ua talafeagai mo i latou. O nisi nei o atinae ua mautinoa le faatupuina ai o i'a ma figota mo le fofoga taumafa a le afioaga. O le lelei ma le alualu i luma o lenei atinae e moomia ai lava le galulue filiga ma le faamaoni o le afioaga ina ia taunuu i se taunuuga lelei ma manuia. Sa taua foi e vaega taitasi, o nisi o figota sa maua i lo latou gataifale ua tauau ina mou atu. O lea ua latou faatalosagaina ai nisi o figota e faatoagaina i lo latou gataifale.

Fuafuaga Faataatitia a le Afioaga

O le matafaioi a le afioaga le mataituina ma le vaaia lelei o i'a ma figota ua tufaina atu mo le faa-faatoagaina i aloaloaemise o le mautinoa lelei o lo latou saogalemu mai le faaleagaina.

Fuafuaga Faataatitia a le Ofisa o Faigafaiva

O le a fesoasoani le ofisa i le tufaina atu lea o figota e faa-faatoagaina i aloalo ma iloilo ina tulaga talafeagai o le gataifale mo nei figota. O le a saunia foi ni aoaoga e faamalamalamaina ai le olaga faa-natura o nei figota aemaise o le mataituina ma le tausiga lelei.'

5.15 Mana o Talosaga

Otootoga

O talitonuga ma talosaga tuufaatasi-faalelotu ua talitonuina ma mautinoa lona taua aua le puipua ma le faasaogalemuina o le siosiomaga o le gataifale ma ona tamaoaiga.

Fuafuaga Faataatitia a le Afioaga

O le sao taua o le aufailotu, o le unia ma faamalosiua i tagatanuu latou te faatauina le puipua ma le faasaoina o le siosiomaga o le gataifale. E taua tele lenei fuafuaga e tuufaatasia ai finagalo o tagata ina ia galulue faatasi e foia faafitauli o loo aliaie mai i le siosiomaga o le gataifale.

Ua lagolagoina foi e le komiti lenei fautuaga, ma fautuaina ai le mamalu o le afioaga ina ia galulue faatasi ma le aufailotu i le faailogaina o le aso o tatalo ma anapogi a si tatou Malo i tausaga taitasi. O le a talosia ai laufanua, gataifale aemaise o tagatanuu o le afioaga.

Fuafuaga Faataatitia a le Ofisa o Faigafaiva

O le a tuuina atu ni fesoasoani a le Ofisa mo le mamalu o le aufailotu e ala i pepa o faamatalaga ma tautalaga ina ia fesoasoani i le tapenaina o a latou lauga ma aoaoga mo le puipua ma le faasaoina i le siosiomaga o le gataifale ma lona tamaoaiga.

6. TALOSAGA

6.1 Talosaga a le Afioaga .

O nei talosaga sa mafai ona tuuina mai e sui o le afioaga sa auai i fonotaga ma le Ofisa o Faigafaiva i taimi o faatalatalanoaga i vaega e tolu. O talosaga uma na tuuina mai sa faamautuina e le Komiti o le Faasao i le latou fonotaga ma le Ofisa. Pe a talafeagai o nei talosaga o le a mafai ona iloilo ina e le Ofisa o Faigafaiva mo le faataunuuna ma le taliaina o lenei tusi e le Pule Mamalu a Alii ma Faipule i le fono tele. O talosaga uma sa tuuina mai o loo faailoa atu i lalo:

- Ogasami Faasao mo ia ma Figota
- Faisua

- Tilapia
- Nisi figota
- Aoaoga tau faigafaiva

7 TOE ILOILOINA O LENEI FUAFUAGA TATAU

Otootoga

O le toe iloiloina o le Fuafuaga Tatau o le Faasaoina o i’a ma figota a le afioaga mo lona agai i luma atoa ma lona toe suesueina ina ia faailoa ai le taua ma le aoga o lenei polokalame i totonu o nuu ma afio’aga, ae maise se auiliiliga maumaututu i le tulai mai o galuega fai a le afioaga ma le Ofisa o Faigafaiva i le faataunuaina o Fuafuaga Faataatitia. O lenei iloiloga e lipotia ai le alualu lelei, ae o a foi ni faaletonu i totonu o le Polokalame talu ona faavaeina i totonu o le afioaga.

Fuafuaga Faataatitia a le Afioaga ma le Ofisa o Faigafaiva

Ua iai le maliliega a le Komiti o le Faasao a Leusoalii ma le Ofisa o Faigafaiva o le a toe auiliiliina lenei Fuafuaga Tatau pe a maea le ono (6) masina talu ona pasia lenei tusi i le Fono tele i le aso 20 Setema 2001. O le a toe feutagai ai le Komiti ma le Ofisa i se aso o le a atofaina pe a atoa le 6 masina.

SUI AUAI O LE FONO FAAIU E TALIAINA LENEI FUAFUAGA:

(O le a faamaeaina pe a maea le fono faaiu mo le taliaina o lenei fuafuaga)

- Pulenuu
- Alii Taua
- Failauga
- Faatonu Lagolago o Faigafaiva
- Alii Ofisa Sili o le Vaega o Faigafaiva
- Alii Ofisa Sinia o Faigafaiva
- Alii Ofisa mo le Va ma Nu
- Alii ma Tamaitai Ofisa
- ma Nisi Sui

SUI O LE KOMITI O LE FAASAO

- Komiti Matai:**
- Komiti Tina:**
- Komiti Aumaga:**